



JABATAN PERKHIDMATAN VETERINAR MALAYSIA

LAPORAN LIPUTAN MEDIA

Isnin, 11 APRIL 2022	
1.	-275 babi dijangkiti ASF akan dimusnah -Seorang lelaki maut disahkan akibat jangkitan rabies
2	Heret anjing kerana kotor, berkutu
3	-‘Bukan tidak serik, tetapi terpaksa jual RM10 sekilogram’ -Peniaga ayam gesa KPDNHEP siasat pembekal
4	-Nelayan asing bunuh kucing buat sup, gulai -Bunuh kucing untuk buat sup, gulai -‘Hari ini ada, esok lusa sudah ghaib’-Kelab Sahabat
5	-Redah lautan seludup ayam, burung -Upah RM580 seludup ayam sabung, Murai Batu
6	Mesyuarat khas bincang operasi pelupusan babi
7	Mahal angkara tamak -Subsidi 60 sen sekilogram ayam

DISEDIAKAN OLEH:

**SEKSYEN KOMUNIKASI KORPORAT
JABATAN PERKHIDMATAN VETERINAR MALAYSIA**



Jabatan Perkhidmatan Veterinar Negeri Sembilan mengesan kes ASF di sebuah ladang ternakan babi di Kampung Baru Tanah Merah Site A, Port Dickson. (Foto Azrul Edham/BH)

275 babi dijangkiti ASF akan dimusnah

Langkah penting elak penularan virus kepada ternakan di ladang lain

Oleh Mahani Ishak, Mohd Amin Jilil dan Abnor Hamizam
Abd Manap
bhnews@bh.com.my

Seremban: Semua 275 ekor babi di sebuah ladang di Kampung Baru Tanah Merah Site A, Port Dickson, dekat sini, yang dijangkiti Demam Babi Afrika (ASF), akan dimusnahkan secepat mungkin.

Pengarah Jabatan Perkhidmatan Veterinar Negeri Sembilan (JPVNS), Dr Redzuan Ibrahim, berkata langkah itu penting bagi mengelak penularan virus kepada ternakan yang berada di ladang lain atau berhampiran.

Beliau berkata, notis pemusnahan binatang berkenaan sudah

diserahkan kepada pemilik ladang terbabit, kelmarin. "Kaedah pemusnahan akan ditentukan dalam masa terdekat selepas satu taklimat diadakan oleh pihak berkuasa berkaitan."

"Ini kerana ia membabitkan kemampuan dan keupayaan pasukan serta mengambil kira pelbagai aspek lain yang berkaitan, terutama keselamatan."

"Namun, agensi keselamatan seperti Polis Diraja Malaysia (PDRM) dan Jabatan Sukarelawan Malaysia (RELA) akan terbabit dalam operasi pelupusan babi berkenaan," katanya.

Dalam pada itu, Dr Redzuan berkata, pihaknya sudah mengesahkan kawalan di ladang terbabit bagi memastikan tiada pergerakan masuk dan keluar ternakan dari kawasan berkenaan.

Beliau berkata, JPVNS sudah menubuhkan pasukan tindakan pantas dan jawatankuasa khas negeri bersama agensi berkaitan bagi mengawal wabak itu.

Ditanya punca jangkitan wa-

bak terbabit, beliau berkata, ia berkemungkinan berpunca dari Perak, yang menjadi antara tiga negeri dikaitkan dengan ASF, termasuk Melaka, namun setakat ini, belum ada bukti yang mengesahkannya.

Penularan kes ASF di negara ini dikesan pada pertengahan tahun lalu, apabila 100 ekor babi liar ditemukan mati di hutan simpan Sabah.

Bagaimanapun, siasatan awal JPV Sabah mendapati tiada tanda awal virus ditemukan pada babi itu.

Pada 24 April tahun lalu, ladang di Sabah diisytiharkan kawasan wabak ASF, membabitkan daerah Pitas, Beluran, Kinabatangan, Lahad Datu, Kota Marudu, Sandakan, Telupid dan Tongod.

Pada Jun pula, Limbang, Kapit dan Miri, Sarawak diisytiharkan kawasan kawalan ASF dan pada 24 Disember tahun lalu, JPV mengesahkan penularan ASF di Melaka berikutan tujuh ladang disahkan positif dengan populasi



Dr Redzuan Ibrahim

Penularan African Swine Fever (ASF) atau penyakit Demam Babi Afrika di Malaysia

10 April 2021: 100 ekor babi liar di hutan simpan Sabah, ditemukan mati disyaki akibat ASF.

24 April 2021: Lapan daerah di Sabah diisytiharkan kawasan wabak ASF, ia membabitkan Pitas, Beluran, Kinabatangan, Lahad Datu, Kota Marudu, Sandakan, Telupid dan Tongod.

Jun 2021: Limbang, Kapit dan Miri, Sarawak diisytiharkan sebagai kawasan kawalan ASF berikutan penyakit itu menular di Sabah dan Utara Kalimantan, Indonesia. Selain di Sibu Sarawak, penyakit ASF turut melanda

16 ladang babi di Melaka, dan babi hutan di kawasan Perak dan Pahang hujung tahun lalu.

14 Disember 2021: Kes pertama ASF dikesan di Penampang, Sabah dan wabak itu menular ke lima kampung di Inobong, Sugud dan Koidupan. Penampang mempunyai dua ladang ternakan babi komersial yang menempatkan sebanyak 2,900 ekor babi.

17 Disember 2021: JPV mengesan ASF pada babi hutan di Bidor dan Sungkai, di Perak, serta Jerantut di Pahang.

20-23 Disember 2021: Sampel diambil untuk mengesan penularan penyakit ASF di tujuh ladang babi komersial di Paya Mengkuang di Masjid Tanah, Melaka.

24 Disember 2021: JPV mengesahkan ada penularan ASF di Melaka.

25 Disember 2021: Tujuh ladang disahkan positif

5,438 ekor babi.

Kelmarin, Pengerusi Jawatankuasa Bertindak Pertanian dan Industri Makanan Negeri Sembilan, Datuk Bakri Sawir, berkata kes positif ASF dikesan susulan sampel yang diambil daripada

penyakit ASF di Melaka dengan jumlah populasi sebanyak 5,438 ekor.

10 Januari 2022: Penyakit ASF dikesan di tiga ladang belakang rumah di Durin, Sibu, ia berlaku selepas JPV mengesahkan babi di 16 ladang komersial dijangkiti penyakit itu di Masjid Tanah, Alor Gajah, dengan sejumlah 1,864 ekor babi dimusnahkan.

13 Januari 2022: 35 ladang ternakan babi sekitar Paya Mengkuang, Masjid Tanah diwartakan sebagai kawasan wabak berjangkit berkuat kuasa serta-merta.

20 Januari 2022: Penampang diisytiharkan sebagai kawasan wabak ASF berikutan 229 ekor babi ternakan persendirian dikesan dijangkiti wabak.

20 Januari 2022: Penampang menjadi daerah ke-20 dilanda penularan ASF di Sabah.

Januari 2022: 10 daerah diisytiharkan bebas wabak selepas 60 hari daripada kes terakhir dilaporkan. Ia termasuk Kota Marudu, Pitas, Sandakan, Kinabatangan, Beluran, Telupid, Tongod, Tawau, Lahad Datu dan Semporna.

12 Mac 2022: JPV Miri melupuskan 585 babi di ladang ternak di Miri dalam operasi bersepadu yang dijalankan selama dua hari.

9 April 2022: Negeri Sembilan merekodkan kes pertama ASF yang dikesan di sebuah ladang di Kampung Baru Tanah Merah Site A, Port Dickson.

275 ekor ternakan.

Tindakan serta-merta diambil, termasuk menyita ladang berkenaan dan meminta bantuan polis memantau ladang terbabit supaya tiada aktiviti keluar masuk ternakan dilakukan.

Seorang lelaki maut disahkan akibat jangkitan rabies

Shah Alam: Kematian seorang lelaki warga tempatan di daerah Petaling pada 10 Mac lalu, disahkan akibat jangkitan rabies.

Pengarah Kesihatan Selangor, Datuk Dr Sha'ari Ngadiman, berkata perkara itu disahkan pada Isnin lalu selepas keputusan ujian makmal diperoleh.

Beliau berkata, mangsa berusia 40 tahun itu meninggal dunia di rumahnya.

"Mayat meninggal telah dihantar ke Hospital Serdang untuk

bedah siasat, dan keputusan ujian makmal bagi spesimen otak didapati positif virus rabies," katanya dalam kenyataan melalui Facebook rasmi Jabatan Kesihatan Selangor (JKNS).

Dr Sha'ari berkata, hasil siasatan dalam kalangan masyarakat setempat mendapati mendiang dilihat berjalan-jalan di sekitar kawasan perumahannya, dua hari sebelum meninggal dunia.

"Punca jangkitan masih dalam siasatan. Tiada gejala dan tanda

penyakit rabies dilaporkan pada kes yang berlaku di Selangor ini," katanya.

Susulan itu, beliau berkata, beberapa langkah pencegahan dan kawalan dijalankan secara bersepadu oleh JKNS, Jabatan Perkhidmatan Veterinar (DVS) Selangor dan pihak berkuasa tempatan (PBT) di Petaling, termasuk penangkapan anjing liar di lokality terbabit bermula 7 April lalu.

"Spesimen haiwan yang di-

tangkap, dihantar ke Institut Penyelidikan Veterinar (VRI)," katanya.

Dr Sha'ari berkata, langkah lain diambil ialah siasatan lapangan oleh Pejabat Kesihatan Daerah Petaling serta Program Active Case Detection (ACD) dalam lingkungan radius satu kilometer dari rumah mendiang.

Selain itu, beliau berkata, surat peka kepada semua fasiliti kesihatan awam dan swasta juga sudah dikeluarkan bagi memper-

tingkat kesedaran serta pengesanan awal kes gigitan anjing atau haiwan liar oleh pengamal perubatan di Selangor.

"Seterusnya, pelantikan dua hospital rujukan kes gigitan anjing di negeri ini, iaitu Hospital Shah Alam dan Hospital Serdang."

"Ini bagi membolehkan penilaian risiko serta kategori luka bagi pemberian vaksin rabies dan rawatan immunoglobulin rabies sekiranya perlu," katanya.

BERNAMA

TARIKH	MEDIA	RUANGAN	MUKA SURAT
11.4.2022	UTUSAN MALAYSIA	DALAM NEGERI	7

Heret anjing kerana kotor, berkutu

JOHOR BAHRU: Anjing kotor dan berkutu yang didakwa tidak sesuai untuk dibawa dalam kenderaan menyebabkan sepasang individu mengheret anjing berkenaan menggunakan kereta.

Bagaimanapun, tindakan pasangan itu menjadi tular dalam satu video di media sosial yang memaparkan seekor anjing ditarik menggunakan Perodua Myvi, baru-baru ini.

Ketua Polis Daerah Johor Bahru Utara, Asisten Komisioner Rupiah Abd. Wahid berkata, susulan itu polis mengesan dua individu tersebut sebelum merakam keterangan mereka dalam kejadian di kawasan perumahan di Taman Sri Skudai, kelmarin.

“Semasa soal siasat, suspek memberitahu anjing berkenaan adalah haiwan peliharaan mereka yang dijumpai semula kotor dan berkutu.

“Mereka merasakan tidak sesuai untuk anjing berkenaan dibawa masuk ke dalam kereta, sebaliknya mereka mengikat anjing berkenaan menggunakan tali sebelum ditarik perlahan-lahan.

“Mereka memaklumkan kawasan anjing berkenaan ditemui tidak jauh daripada kediaman mereka,” katanya dalam kenyataan semalam.

Menurut beliau, pasangan itu dibebaskan dengan jaminan polis selepas kenyataan diambil berhubung kejadian tersebut.

Katanya, kes disiasat mengikut Seksyen 428 Kanun Keseksaan dan Seksyen 44(1)(a) Akta Binatang 1953 dan kertas siasatan akan dirujuk kepada pejabat Timbalan Pendakwa Raya Johor untuk tindakan lanjut.

Beberapa hari lalu, tular sebuah video berdurasi sembilan saat di media sosial memaparkan sebuah kereta jenis Perodua Myvi berwarna putih sedang mengheret seekor anjing menggunakan tali di sebuah kawasan perumahan.

'Bukan tidak serik, tetapi terpaksa jual RM10 sekilogram'

Oleh ROSALINDA MD.SAID
rosalinda.said@mediamula.com.my

KUALA TERENGGANU: Kalangan 12 peniaga ayam di Pasar Chabang Tiga yang dikompaun RM500 baru-baru ini kekal menjual barangan berkenaan pada harga RM10 sekilogram demi meneruskan kelangsungan perniagaan mereka.

Bercakap kepada *Utusan Malaysia*, seorang peniaga, Wali Ridzuan Hudin Abdul Manan, 36, berkata, walaupun bakal berdepan tindakan saman oleh pihak berkuasa, kesemua mereka bersedia menanggung akibat kerana gagal mematuhi harga minimum sebanyak RM8.90 sekilogram yang ditetapkan.

Katanya, tindakan melanggar harga berkenaan terpaksa dilakukan bagi menampung kos operasi mencecah RM120 setiap hari.

"Kami bukan sengaja melanggar peraturan tetapi terpaksa. Kalau ikut harga ditetapkan, saya dan kawan-kawan tidak boleh cari makan sebab ayam yang dibeli daripada pembekal sudah RM8.70 sekilogram.

"Dalam sehari kos operasi setiap hari termasuk upah seorang pekerja di samping ais dan plastik pun mencecah RM120, jadi bagaimana saya mahu menampung semua itu jika pulangan cuma 20 sen untuk setiap ayam yang terjual," katanya semalam.

Khamis lalu, suasana di Pasar Chabang Tiga kecoh apabila seramai 11 peniaga termasuk seorang pemborong dikenakan kompaun



KALANGAN peniaga ayam di Pasar Chabang Tiga kekal menjual pada harga RM10 sekilogram walaupun dikenakan kompaun serta-merta RM500 baru-baru ini. - UTUSAN/PUQTRA HAIRRY ROSLI

serta merta sebanyak RM500 seorang gara-gara menjual ayam segar melebihi harga RM8.90 yang ditetapkan.

Menerusi video berdurasi satu minit 37 saat yang tular di media sosial, seorang peniaga mendakwa terpaksa mengorbankan wang bagi membeli pakaian raya anak-anaknya bagi membayar kompaun Kementerian Perdagangan Dalam Negeri dan Hal Ehwal Pengguna (KPD-NHEP).

Wali Ridzuan Hudin berkata,

tindakannya menularkan video berkenaan bukan untuk mencekutkan kontroversi sebaliknya, mahu semua pihak termasuk kerajaan dan pengguna memahami bebanan yang ditanggung peniaga sebagai mangsa keadaan.

Katanya, pendedahan itu sekali gus membuatkan rata-rata pengguna sedar situasi sebenar dan tidak lagi mengecam peniaga kerana menjual mahal, malah jualan ayam di kedainya berjalan seperti biasa dengan se-

hingga 75 ekor laris dalam sehari

Bagaimanapun, dia menafikan dakwaan kononnya peniaga di pasar berkenaan menipu pengguna dengan mempamerkan harga minimum, namun mengenakan nilai yang lebih mahal.

Sementara itu, Wali Ridzuan Hudin mengakui beberapa individu pemurah tampil mahu menghulurkan bantuan kerana simpati nasib dialaminya, namun terpaksa ditolak kerana masih berkemampuan.

Peniaga ayam gesa KPDNHEP siasat pembekal

KUALA TERENGGANU:

Walaupun dikecam teruk kerana gagal mengemukakan bukti pembelian mahal, kumpulan peniaga ayam di Pasar Chabang Tiga di sini nekad tidak akan mendedahkan pembekal mereka.

Bercakap kepada *Utusan Malaysia*, seorang peniaga yang enggan dikenali berkata, tindakan mendedahkan butiran berkenaan bakal memusnahkan perniagaan mereka kerana berisiko diugut pembekal.

Katanya, jika keadaan itu berlaku tentunya bekalan ayam akan dihentikan pihak pembekal serta-merta sekali gus menyebabkan mereka kehilangan mata pencarian utama.

“Semua peniaga ada resit pembelian tetapi tidak boleh didedahkan kepada penguatkuasa kerana takut dihentikan bekalan.

“Ramai yang tidak tahu realiti kami yang sentiasa tersepit, macam mana kami nak cari makan kalau pembekal ugut menghentikan bekalan dan keadaan menjadi lebih buruk jika ada peniaga yang masih berhutang dengan mereka. Sudahlah tidak dapat berniaga dan terpaksa melangsaikan hutang pula,” katanya semalam.

Khamis lalu, seramai 11 peniaga termasuk seorang pemborong di Pasar Chabang Tiga dikenakan kompaun serta merta sebanyak RM500 seorang gara-gara menjual ayam segar melebihi harga RM8.90 yang ditetapkan.

Menurut peniaga berkenaan, dilema mereka itu bagaimanapun disedari Kementerian Perdagangan Dalam Negeri dan Hal Ehwal Pengguna (KPDNHEP), sekali gus berharap pihak penguatkuasa dapat melakukan pemeriksaan terhadap pembekal berdaftar.

Kaedah lupus ternakan babi hari ini

PORT DICKSON: Jabatan Perkhidmatan Veterinar (JPV) Negeri Sembilan akan memutuskan kaedah untuk melupuskan kesemua babi di ladang yang dijangkiti wabak Demam Babi Afrika (ASF) semalam.

Pengarahnya, Dr. Redzuan Ibrahim berkata, ia termasuk mengambil kira kaedah yang pernah digunakan bagi melupuskan kira-kira 16,000 ekor babi daripada 19 buah ladang di Paya Mengkuang, Masjid Tanah, Melaka yang turut diserang wabak yang sama pada Januari lalu.

"Kami akan membincangkan kaedah yang sesuai untuk pelupusan babi yang dijangkiti virus berkenaan petang esok (hari ini). Ia akan mengambil kira pelbagai aspek supaya tidak menyiksa atau menimbulkan kegusaran daripada pertubuhan bukan kerajaan (NGO).

"Pada masa yang sama, pihak JPV Negeri Sembilan juga memantau di depan ladang haram berkenaan selama 24 jam bagi mengelakkan kemasukan orang, kenderaan, motosikal atau apa-apa kenderaan yang boleh membawa virus tersebut. Disebabkan itu, kami mengawal ketat depan pintu pagar ladang ladang tersebut," kata beliau ketika dihubungi semalam.

Semalam, media melaporkan, Negeri Sembilan mencatatkan kes wabak ASF selepas



SEBUAH ladang babi yang ditutup dan dikawal pihak berkuasa susulan berlakunya jangkitan wabak ASF di Kampung Baru Site A, Tanah Merah, Lukut, Port Dickson.

ia sah berlaku di Kampung Baru Site A, Tanah Merah, Lukut, Port Dickson.

Dua kes positif itu disahkan telah menjangkiti babi di sebuah ladang yang tidak berlesen dan dipercayai dibawa dari Perak.

Dalam pada itu, Redzuan me-

nasihatkan peternak agar berhati-hati sekiranya ada pihak yang cuba menjual babi di bawah harga pasaran.

"Saya memohon kepada mana-mana penternak yang mendapat harga di bawah harga pasaran dan tidak mempunyai sijil kesiha-

tan yang sah agar berhati-hati.

"Kemungkinan harga juga akan turun dalam masa terdekat ini. Harga pasaran bagi babi yang siap disembelih adalah RM13 sekilogram manakala babi hidup pula sebanyak RM11 sekilogram," katanya.



Nelayan asing bunuh kucing buat sup, gulai

PENIAGA di Pasar Tok Bali, Pasir Puteh, Kelantan mendakwa perbuatan warga asing memakan kucing bukanlah perkara aneh kerana kebanyakan mereka memasak haiwan itu untuk dijadikan sup atau gulai ketika berada di atas bot sejak bertahun-tahun lamanya.

» BERITA DI MUKA 6

Peniaga pasar Tok Bali dakwa nelayan asing buat lauk di atas bot

Bunuh kucing untuk buat sup, gulai

Oleh TOREK SULONG

PASIR PUTEH – Peniaga di Pasar Tok Bali di sini mendakwa perbuatan warga asing memakan kucing bukanlah perkara asing kerana kebanyakan mereka memasak haiwan itu untuk dijadikan sup atau gulai ketika berada di atas bot sejak bertahun lamanya.

Penduduk mendakwa, warga asing bekerja sebagai nelayan itu gemar menangkap kucing jalanan yang dibuang di sekitar pasar berkenaan untuk dijadikan lauk di atas bot.

Penjual ikan, Zakuan Ismail, 35, berkata, bimbang dengan perbuatan kejam itu, satu notis melarang orang ramai membuang kucing belaan telah dipasang di sekitar pasar.

"Pasar ini menjadi tumpuan nelayan asing tangkap dan masak kucing untuk dimakan. Mereka tahu pasar tempat orang buang kucing dan tanpa rasa bersalah mereka kutip untuk dimasak."

"Kami hairan mengapa nelayan makan kucing, kerana mereka boleh saja makan ikan dan hasil laut lain di atas bot. Bagi mengekang kejadian itu, kami berpesan kepada penduduk supaya jangan buang kucing di pasar," katanya kepada Kosmo!.

Semalam Kosmo! Ahad melaporkan, kehilangan kucing



NOTIS yang dipasang di Pasar Tok Bali untuk melarang pembuangan kucing di pasar itu bagi mengelak ditangkap warga asing untuk dijadikan makanan. – TOREK SULONG

dalam kuantiti yang banyak telah menimbulkan tanda tanya dan keresahan dalam kalangan penduduk dan peniaga Pasar

Besar Temerloh, Pahang yang mengesyaki haiwan itu kini jadi hidangan oleh warga asing.

Peniaga mendakwa pernah

terserempak dengan beberapa warga asing yang menangkap sebelum memukul kepala haiwan tersebut dengan kayu lalu



KERATAN Kosmo! semalam.

dimasukkan ke dalam guni dan dibawa ke lokasi tertentu untuk dilapah serta dimakan.

Lebih menguatkan dakwaan apabila sebahagian makanan untuk kucing terbiar langsung tidak diusik.

Seorang lagi peniaga yang dikenali sebagai Ahmad, 44, berkata, ratusan kucing yang ada di pasar itu mula berkurangan sejak akhir-akhir ini.

"Ada suku kaum warga asing yang gemar makan haiwan sebegini termasuk biawak dan anjing. Ia sudah diketahui umum dan kami berharap supaya pemilik lebih bertanggungjawab untuk tidak membuang haiwan itu di pasar," katanya.

Menurut Ahmad, ada kemungkinan kucing itu dipukul di kepala atau ditangkap dan dibunuh sebelum kulitnya dilapah untuk juadah nelayan ketika berada di atas bot.

'Hari ini ada, esok lusa sudah ghaib' – Kelab Sahabat

KUANTAN – Kehilangan kucing dalam kuantiti yang banyak yang dipercayai untuk dijadikan hidangan oleh warga asing didakwa berlaku secara berleluasa bukan sahaja di Temerloh tetapi di sekitar daerah ini.

Pengerusi Kelab Sahabat Kucing Jalanan Pahang, Jurina Abdul Rani berkata, pihaknya banyak menerima aduan mengenai isu berkenaan daripada orang ramai, namun tidak mempunyai bukti yang cukup untuk dipanjangkan kepada pihak berkuasa.

"Kucing-kucing jalanan yang kami beri makan setiap hari di beberapa kawasan semakin berkurangan. Jika ada kucing baru dibuang, ia akan hilang selepas beberapa hari."

"Kami berharap pihak berkuasa boleh memasang kamera litar tertutup di kawasan tertentu yang bukan sahaja dapat mengenal pasti individu yang menangkap dan menganiaya haiwan berkenaan tetapi mereka yang membuang kucing," katanya kepada Kosmo!.

Semalam Kosmo! Ahad melaporkan mengenai keresahan penduduk dan peniaga Pasar Be-



AHLI Kelab Sahabat Kucing Jalanan Pahang menyantuni sebahagian kucing yang terdapat di Kuantan baru-baru ini.

sar Temerloh mengenai kehilangan kucing dalam kuantiti yang banyak kerana mengesyaki haiwan itu menjadi hidangan oleh warga asing.

Peniaga mendakwa pernah

terserempak dengan beberapa warga asing yang menangkap sebelum memukul kepala haiwan tersebut dengan kayu lalu dimasukkan ke dalam guni dan dibawa ke lokasi tertentu untuk dilapah



CHE WAN NORNAJIHA

serta dimakan.

Lebih menguatkan dakwaan apabila sebahagian makanan untuk kucing terbiar langsung tidak diusik sedangkan kawasan itu menjadi tumpuan haiwan berkenaan berkumpul.

Menurut Jurina, pihak berkuasa perlu mengambil tindakan segera dalam isu yang menimbulkan keresahan dalam kalangan masyarakat ini agar kucing-kucing ini tidak terus teraniaya.

Tambahnya, kelab pernah

memohon agar pihak berkenaan khususnya Jabatan Veterinar menegakkan undang-undang sedia ada tetapi tiada tindakan lanjut.

Sementara itu, pencinta kucing, Che Wan Nornajiha Che Wan Rozali, 27, melahirkan rasa geram dan sedih dengan tindakan kejam segelintir warga asing itu.

Katanya, dia pernah mendengar mengenai perbuatan tidak berperikemanusiaan itu berlaku di sebuah kawasan perumahan di Balok dekat sini ketika bekerja di sebuah pasar mini.

Katanya, penduduk memaklumkan ada warga asing yang menjadikan kucing sebagai makanan hingga mengakibatkan kekecohan dalam kalangan penduduk.

"Banyak kucing hilang dan apabila dicari hanya bulu haiwan itu sahaja ditemui. Ia kejadian lama dan kalau tak silap kes itu sudah diselesaikan oleh pihak berkuasa dan penduduk."

"Bila dapat tahu ia berlaku di Temerloh, saya rasa sedih, sakit hati dan marah apabila mengenangkan nasib kucing-kucing yang hilang itu," katanya.

Redah lautan seludup ayam, burung

Sindiket pilih Malaysia jadi transit bawa haiwan bernilai lebih RM1 juta ke negara jiran

SINDIKET penyeludupan bukan sahaja menjadikan perairan negara ini sebagai laluan untuk menyeludup manusia dan dadah, malah transit untuk membawa ratusan ekor ayam sabung dan burung Murai Batu bernilai lebih RM1 juta ke negara jiran.

Harga ayam sabung Siam yang tinggi di Indonesia iaitu hampir RM10,000 seekor, manakala Murai Batu RM4,000 seekor menyebabkan sindiket sanggup meredah lautan menyeludup haiwan itu dari Thailand ke negara jiran tersebut.

Pengarah Maritim Negeri Kedah dan Perlis, Laksamana Pertama Maritim Mohd. Zawawi Abdullah mendedahkan, sindiket terbabit telah menjadikan Langkawi sebagai transit untuk melakukan kegiatan haram itu pada waktu malam.

► LAPORAN DI MUKA 2



MOHD. ZAWAWI menunjukkan ayam sabung yang berjaya dirampas di Langkawi.

Upah RM580 seludup ayam sabung, Murai Batu

LANGKAWI – Penyeludup dipercayai menerima upah antara RM120 hingga RM580 bagi setiap pendaratan ayam sabung dan burung Murai Batu yang berjaya dilakukan di Indonesia.

Pengarah Maritim Negeri Kedah dan Perlis, Laksamana Pertama Maritim Mohd. Zawawi Abdullah berkata, jumlah upah itu boleh bertambah mengikut jenis dan kuantiti barangan yang mahu diseludup.

"Mereka juga menerima sejumlah komisen sebagai bonus atau habuan tambahan," katanya kepada Kosmo! baru-baru ini.

Menurutnya, penyeludup didapati menggunakan laluan yang terletak di sebelah utara Pulau Langkawi di mana ia merupakan jarak paling hampir dengan sempadan negara jiran iaitu Pulau Tarutao di Thailand.

Katanya, dengan jarak kira-kira 2.1 batu nautika di antara Pu-



ANTARA burung Murai Batu yang dirampas APMM.

lau Langkawi dan Pulau Tarutao, ia merupakan kawasan hot spot bagi kegiatan penyeludupan.

"Sebaik keluar dari perairan negara Thailand, kebiasaannya bot menggunakan laluan pintas menerusi perairan negara ini

menuju ke Aceh, Indonesia bagi tujuan pendaratan," ujarnya.

Jelasnya, masa yang diambil bagi perjalanan jarak lebih kurang 150 batu nautika itu adalah di antara 8 hingga 10 jam untuk tiba ke destinasi, bagi perjalanan sehalu.

Sindiket menggunakan bot fiber berkuasa tinggi iaitu dua enjin dengan 200 kuasa kuda.

"Setiap ekor ayam sabung diletakkan di dalam kotak kayu khas, manakala Murai Batu diletakkan di dalam sangkar.

"Haiwan yang mahu diseludup itu telah diberi makan secukupnya sebelum memulakan perjalanan," ujarnya.

Menurutnya, APMM percaya urusan jual beli di antara Thailand-Indonesia itu juga berkembang akan berkembang ke negara Asia lain penduduk lain juga mempunyai minat sama terhadap haiwan berkenaan.



BOT yang digunakan sindiket untuk menyeludup ayam sabung dirampas APMM.

Mesyuarat khas bincang operasi pelupusan babi

SEREMBAN - Satu mesyuarat khas akan diadakan pada Isnin untuk membincangkan operasi pelupusan 275 ekor babi di sebuah ladang babi tidak berlesen di Kampung Baru Site A di Tanah Merah, Port Dickson susulan kes penyakit Demam Babi Afrika (ASF).



BAKRI

Exco Pertanian dan Industri Makanan Negeri Sembilan, Datuk Bakri Sawir berkata, perkara utama yang akan dibincangkan ialah soal kelengkapan logistik kerana jika tidak diurus dengan baik ia boleh menjangkiti babi lain.

“Mesyuarat itu bakal melibatkan semua agensi berkaitan yang akan diketuai oleh Jabatan Veterinar.

“Tindakan segera perlu diambil bagi memastikan ia tidak merebak ke lokasi lain.

“Tindakan saman turut akan diambil kepada pengusaha kerana beroperasi tanpa lesen,” katanya ketika dihubungi pada Ahad.

Menurutnya, buat masa ini tidak dapat dipastikan berapa lagi ekor babi yang telah dijangkiti penyakit itu kerana ladang berkenaan telah pun ditutup.

Ujarnya, rondaan keselamatan di kawasan ladang berkenaan turut diperketat supaya tiada aktiviti keluar masuk ternakan dilakukan.

Dalam pada itu, beliau menafikan tiada tindakan diambil terhadap 20 pengusaha lain yang dipercayai beroperasi tanpa lesen di kawasan itu.

“Sebelum ini tiga ke empat pengusaha telah diberi notis saman. Cuma yang jadi masalahnya apabila tiada ternakan babi di ladang berkenaan apabila pemeriksaan dilakukan.

“Jadi agak sukar tindakan undang-undang diambil. Tapi pemantauan sentiasa dilakukan,” katanya.



PENIAGA dilihat menjual ayam mengikut harga siling ditetapkan kerajaan di Pasar Harian Selayang, Kuala Lumpur.

Subsidi 60 sen sekilogram ayam

Peruntukan RM300j sudah diluluskan untuk menstabil harga

Oleh Ekhwan Haque
Fazlul Haque
ekhwan@hmetro.com.my

Kuala Lumpur

Harga ayam sepatutnya tidak mengalami kenaikan mendadak memandangkan kerajaan sudah memberi subsidi di peringkat ladang.

Timbalan Menteri Perdagangan Dalam Negeri dan Hal Ehwal Pengguna Datuk Rosol Wahid berkata, peruntukan RM300 juta sudah diluluskan kerajaan untuk menstabilkan harga.

Menurutnya, setiap kilog-

ram ayam di ladang akan menerima subsidi 60 sen dan ia adalah komitmen kerajaan untuk menstabilkan harga.

"Apabila subsidi diberikan kepada penternak, mereka boleh jual kepada pemborong dengan harga lebih rendah dengan RM5.60 sekilogram.

"Manakala pemborong pula menjual RM7.60 sekilogram kepada peniaga dan pengguna akan menerima harga siling RM8.90 sekilogram.

"Tapi kenaikan harga dalam rantaian ini berlaku jika masih ada pihak yang mahu mengaut keuntungan ber-

ganda memandangkan permintaan tinggi," katanya ketika dihubungi Harian Metro.

Rosol berkata, penguatkuasaan yang dijalankan kementerian juga mendapati ada peniaga yang enggan berkongsi maklumat lanjut mengenai kenaikan harga.

Katanya, keadaan ini menyukarkan kementerian mengambil tindakan kepada pihak yang culas dan mahu untung berganda.

"Ada peniaga enggan bagi maklumat kenaikan harga kerana takut pemborong tidak mahu bekalkan ayam kepada mereka.

"Apabila dakwa harga naik daripada pemborong, mereka perlu tampil beri maklumat dan dokumen berkaitan seperti resit sebagai bukti kenaikan.

"Tindakan terpaksa diambil jika tiada bukti kukuh yang boleh dikemukakan peniaga," katanya.

Polemik kenaikan harga ayam mentah sudah berlarutan, namun kembali stabil untuk tempoh beberapa bulan lalu.

Namun sejak awal Ramadan, pengguna dan peniaga merungut ekoran kenaikan harga ayam sehingga terpaksa dijual melebihi harga siling.